

# 鞏縣志

245417  
部515  
第五冊  
卷十五  
古蹟志上  
卷十六  
古蹟志下  
卷十七  
金石志

鞏縣志卷之十五

鞏縣知縣李述武纂修

古蹟志上

聖人云無徵不信考古者必據經史為本博采群書為證佐其稗官野史荒怪俚俗之說不錄焉又必議論精確衷於至當無穿鑿無踳駁無攻擊斯足傳信千載矣施府志考証綜核立論亦正茲以為綿蕞間亦發明數條於下焉志古蹟

邑城

周坎氏邑 〔春秋僖二十四年傳〕王出及坎飲〔杜注〕周地〔路史〕坎氏鞏縣東坎窰聚服云鞏東邑

周鄆邑 〔春秋昭二十三年傳〕郊鄆潰〔杜注〕郊鄆二邑皆子朝所得 〔水經注〕洛水歷鄆中水南謂之南鄆亦曰上鄆鞏洛渡北謂之下鄆亦謂之北鄆有鄆城盖周大夫鄆盼之舊邑也 盼左傳作盼 羅水謂之長川羅 文淵閣校本作長羅川 亦曰羅中蓋盼子鄆羅之宿居故川得其名耳 〔施府志〕羅為盼之子鄆羅之宿居即鄆盼之舊邑水經注解羅水得名以近鄆羅之居而名之非謂鄆羅鄆盼之居有兩地也

周榮錡氏 〔山河兩界考注〕莊元年王使榮叔來錫桓公命杜注榮叔周大夫榮氏叔字案竹書成王九年使榮伯錫肅慎氏命厲王元年王作夷宮命卿氏榮夷公落韋昭曰榮國

名馬蝠曰周同姓畿內諸侯爲卿大夫也昭二十三年王崩於榮錡氏杜注河南鞏縣西有榮錡澗路史以爲即榮國周脾經有榮方戴記宰我問有榮伊〔施府志〕周有榮叔殷有錡氏二者皆依榮錡生意並存之可也

周石氏邑〔山河兩界考注〕莊十九年傳石速與五大夫作亂因蘇氏杜注膳夫石速也周語惠王三年石速出王而立王子頹是也水經注洛水又東逕鞏縣故城南又東濁水注之又東北合河水水發南谿石泉亦名爲石泉水今鞏縣東南有石子河石蓋其采地也昭三十三年王使石張如晉定十四年天王使石尙來歸賑是皆石速後〔施府志〕石子

河方輿紀要以爲玉仙河今鞏玉仙河水入汜不入洛與水經注石泉入洛異鞏又有石河道在鞏西不在鞏東與水經注亦不合據水經注當即市河水耳

周皇邑 春秋昭二十二年劉子單子以王猛居於皇左傳單子以王次於皇鄴肸伐皇〔杜注〕河南鞏縣西南有黃亭〔水經注〕京相璠曰訾城北三里有黃亭陌宋本作即此亭也春秋所謂次於黃者也 施府志按說嵩見水經注黃皇字異以爲次於黃乃登封許由所居之黃城而反疑長人爲誤今據春秋傳單子欲如晉告急以王次於皇晉籍談荀爍賈辛司馬督帥師軍於陰於侯氏於谿泉次於社侯氏即緱氏近鞏

谿泉即明谿社即五社津皆鞏地晉人勤王之師俱在鞏而謂皇爲登封之黃城去鞏尙百餘里當不其然

周訾城 〔春秋昭二十二年傳〕夏四月己酉單子取訾〔水經〕洛水又東逕訾城北又東羅水注之 〔施府志〕訾城今名訾店俗又譌爲小芝田東北里許爲羅水入洛處在縣西南四十里

周東訾城 春秋昭二十四年傳王子朝用成周之寶珪於河津人得諸河上陰不佞拘得玉者取其玉將賣之則爲石王定而獻之與之東訾 二十五年傳尹文公涉於鞏焚東訾不克 〔施府志〕左傳旣別爲東訾明東訾與訾不一地杜

注乃指爲一誤矣路史謂訾有二西訾在洛東訾在鞏雖較勝杜氏而所目之地與傳文亦不合傳謂涉鞏焚東訾則鞏訾不過相隔一水耳晉石勒擊劉曜於洛陽至城臯捲甲啣枚詭道兼行出於鞏訾之間曰鞏訾之間知鞏訾不相遠也今鞏訾城在故鞏城西與故鞏城相去尙數十里是鞏之訾城已爲西訾而故鞏城之東必更別有東訾其地雖不可確指固知二訾俱在鞏不得謂一在洛一在鞏也

周萇宏邑 〔山河兩界考注〕定元年孟懿子會城成周晉女叔寬曰萇宏違天杜注天旣厭周德萇宏欲遷都以延其祚故曰違天哀三年六月癸卯周人殺萇宏杜注終違天之禍

案子貢詩傳萇宏忠於王晉趙鞅殺之周人傷之賦有兔左傳及杜注皆以爲城周違天之咎謬矣路史姬姓有萇伯漢書藝文志有萇宏十五篇魏收地形志范陽萇鄉縣有萇鄉城大康地記涿郡有萇鄉古萇長通用今鞏縣西南有長羅川源出方山〔施府志〕徐注謂萇長通用鞏之長羅即萇宏之采邑也夫羅旣爲鄴羅之邑矣何得又爲萇宏之邑乎豈鄴羅父子黨子朝子朝奔而邑遂廢歟抑萇宏之邑近羅水而遂名爲長羅歟徐氏之說當必有所自出毋庸輕議也東周君城〔施府志〕東周故城在今康店縣志謂在今孝義村尙隔一水矣城半在邙山上半在邙山下遺址尙存有鞏

王廟鞏未嘗稱王而曰王者豈赧王獻地後東周君保遺民民尊鞏爲王歟

漢鞏縣故城〔水經〕洛水又東北過鞏縣東〔酈注〕洛水又東逕鞏縣故城南東周所居也 施府志桑欽西漢人而曰過縣東則作經時縣猶在洛水西故鞏城也道元後魏人而已目爲故鞏城則後魏以前縣治已移洛水南今縣治也方輿紀要謂隋大業初移縣治洛口蓋隋自今縣治而移非自故城移也

漢小平城〔名勝志〕郡國志云小平城漢縣廢址在今鞏縣西北有河津曰小平津即城之隅也黃河西自偃師縣界流

入於此有五社渡又爲五社津後漢朱鮪遣賈強從五社津渡是矣〔施府志〕小平城在平陰東北平陰在孟津縣故方輿紀要以小平城屬孟津不知小平平陰本非一地平陰故城在今孟津鞏接孟壤故小平城遂入鞏縣其地在今鞏西北裴峪渡裴平音轉故也

漢袁公固〔水經注〕羅水西北逕袁公塢北蓋公路始固有此也〔施府志〕水經注曰始固者對偃師袁術固而言也固即城也

隋洛口倉城〔方輿紀要〕隋大業三年於鞏東南原上築倉周回二十餘里穿三千窖窖容八千石亦曰興洛倉十二年

以盜賊充斥命移兵守洛口倉城〔一統志〕洛口倉在河南府鞏縣西〔方輿紀要〕隋大業初移鞏縣治於洛口李密洛口城〔方輿紀要〕李密說翟讓曰洛口倉多積粟去都百里有餘先無預條取之如拾芥耳遂襲克興洛倉密稱魏公命護軍田茂廣築洛口城方四十里而居之

李密偃月城〔方輿紀要〕李密臨洛築偃月城與倉城相應既而與王世充戰於洛北敗走洛南餘衆東走月城唐武德三年世民伐王世充遣王君廓自洛口斷其餉道今縣東有洛口驛〔施府志〕偃月城在鞏而洛陽志以爲在洛者以偃月與倉城相近也不知所謂倉城者鞏之興洛倉城非

洛之回洛倉城也且回洛倉城亦在孟津不在洛陽

北齊王藥城〔方輿紀要〕鞏東北濱河高齊時戍守處周建德四年宇文憲等入齊境降拔三十餘城師還皆棄不守惟以王藥城爲要害遣將韓正守之正以城降齊

宋永安城〔方輿紀要〕鞏縣西南四十里宋太祖父昭皇帝葬於此日永安陵景德中割鞏偃二縣置邑以奉陵寢後爲永安軍自太祖至哲宗八陵皆葬於城西南諸原上

宋南城〔方輿紀要〕宋有永安軍又有南城軍亦在鞏縣西南紹興二年岳飛遣諸將收復河南楊遇復南城軍張憲復永安軍是也〔施府志〕南城在今鞏西南七十里名南邨

與偃師古滑城相近

金芝田縣〔方輿紀要〕金改永安爲芝田縣元廢〔施府志〕芝田今爲鎮

宮殿 臺室亭館附

夏頃宮〔竹書紀年〕帝癸即位居斟鄩築頃宮〔徐箋〕括地志故鄩城在鞏縣西南淮南墜形訓頃宮璇室高誘曰頃宮宮滿一頃璇室以璇玉飾宮 施府志一統志禹封夏伯於鄩城帝癸居之築頃宮據高誘注地滿一頃固不若阿房建章之侈然禹卑宮室而後世如此已不能繼厥舊服矣自古亡國不一端峻宇雕牆其一也可不戒哉

隋洛口龍舟殿 大業雜記車駕幸江都自漕渠口下乘小朱  
航行次洛口御龍舟皇后御翔螭舟其龍舟高四十五尺闊  
五十尺長二百尺四重上一重有正殿內殿東西朝堂周以  
軒廊中二重有一百六十房皆飾以丹粉粧以金碧珠翠雕  
刻奇麗綴以流蘇羽葆朱絲網絡下一重長秋內侍及乘舟  
水手以素絲大條繩六條兩岸引進其引船入並名殿脚一  
千八十人俱着雜錦綵粧襖子行纏鞋襪等分爲三番皇后  
御次水殿名翔螭其殿脚有九百人又有小水殿九名浮景  
舟並三重朱絲網絡已下殿脚爲兩番番一百人諸嬪妃乘  
大朱航三十六名漾綵船並兩重加網絡殿脚百人又有朱  
鳥船蒼龍船白虎船元武船各二十四其駕船人名船脚又  
有飛羽船六十青鳧舸十凌波舸十宮人習水者乘之又有  
五樓船三樓船二樓船板榻黃蔑舫並給黃衣夫又有平乘  
五百艘青龍五百艘蒙幢五百艘八擢舸二百艘舩舫舸二  
百艘並十二衛兵所乘載兵器帳幙兵士自乘不給夫發洛  
口部 〔施府志〕鞏邑當隋唐時幸無宮殿土木之擾然洛  
口龍舟其爲煩費不支龍舟必在洛口者以數千百舫艫洛  
水不能容故皆置舟於洛水入河之處其上諸殿無可附附  
之於洛口可也

古夏臺

綱目前編帝履癸四十有二載夏王桀囚商湯於夏



臺既而釋之

李密黃冶臺 〔李通志〕在鞏縣東南即李密與李淵相拒處  
其址尚存

晉慎終之室 〔晉書〕稽含自號亳邱子門曰歸厚之門室曰  
慎終之室

按稽紹傳含字君道家在鞏縣亳邱自號亳邱子互詳宅下 又按亳在偃師鞏縣有亳邱也舊縣志引漢書河南志云鞏有景亳李通志鞏縣西連古亳今鞏西南六莊  
□亳正南爲殷人圓丘祭天處故曰亳邱  
又名六莊者爲湯禱雨以六事自責也

黃亭 〔水經注〕訾城北三里有黃亭

周洛汭館 〔春秋昭元年傳〕天王使劉定公勞趙孟於穎館  
於洛汭劉子曰美哉禹功明德遠矣徵禹吾其魚乎

後魏蒲池 〔水經注〕羅水西北流蒲池水注之水出南蒲陂

西北流合羅水

宅里 鄉村聚務附

漢三田故里 〔續齊諧記〕田真兄弟三人共議分財生貲皆  
平均惟堂前一株荊樹共議欲破三片明日就截之其樹即  
枯死狀如燃火真往見之大驚謂諸弟曰樹本同株聞將分  
斫所以顛賴是人不如木也因悲不自勝不復解樹樹應聲  
榮茂兄弟相感合財寶遂爲孝門 〔施府志〕縣西南二十  
里孝義保據縣志以田氏紫荆得名考續齊諧記田真京兆  
人不言鞏人且縣志以田真爲隋人而續齊諧乃梁吳均撰

又陸機詩三荆歡同林在晉時已用田氏事則鞏志以爲隋人者誤也至其故里或在京兆或在鞏不防兩存之耳

按府志引陸機詩指田真非隋人是已直目爲漢人蓋見列於漢宣帝皂蓋車之下魏明帝游洛水之前故耳考續齊譜所記本無時代次第觀楚屈原列在晉武帝以後可知通志書晉三田冢陸機晉人更不宜以本朝事爲典實大約晉以前人係之於漢亦屬可信俟□博者再核實焉

晉嵇含宅 〔晉書〕嵇含家鞏縣毫邱 互詳室下

唐杜甫故里 〔舊唐書〕杜甫字子美本襄陽人後徙河南鞏縣〔杜詩逸事〕甫十餘歲夢人令采文石於康水覺而問人此水在二十里外乃往求之見峩冠童子告曰汝本文星典吏天使汝下謫爲唐世文章雲誥已降可於豆壠下取甫從其言果得一石有金字文云詩人本在陳芳國九夜捫之

麟篆熟聲振扶桑享天福 〔施府志〕鞏縣東二里瑤灣工部故里也故鞏城有康水去瑤灣二十里與逸事合

宋蔡齊宅 〔李通志〕齊字子思鞏縣人 施府志鞏西南永安故縣東有蔡庄鞏志以爲蔡齊故里其宅北直眞宗定陵今爲蔡庄廟廟前石坊鐫蔡文忠公故居考東都事畧及宋史併云齊膠水人不言在鞏且洛陽志亦載之據史其先洛陽人曾祖綰爲膠水令遂家焉齊固非洛人史又稱齊少孤依外家劉氏豈外家在鞏而齊遠來相依歟然不可考矣

金盧亞宅 〔通志〕盧亞金正大中狀元 〔施府志〕鞏永安廢縣中有狀元坊爲盧亞立也亞生時永安產靈芝金遂改

永安爲芝田亞宅在今芝田鎮北街據狀元譜無亞名蓋譜惟列宋元正統亞爲金狀元故不見於譜而見於通志但通志不以亞爲鞏人而以爲偃師人何也蓋亞嘗讀書緱山緱山舊隸永安今入偃師通志乃據偃志登入非其實也至鞏志載亞爲元至正狀元且引順帝時產靈芝爲言改芝田在金時元時金芝田已廢於元季產靈芝無涉縣志又載吳臨川送盧廉使還朝序以爲即盧亞不知盧廉使自別一人官翰林非狀元也

鄉聚

宋訾鄉

〔馬端臨文獻通考〕宋宣祖安陵舊在京城東南隅

鞏縣志

第五册

卷之十五

古蹟

十

河南商務印刷所印

太祖乾元年改卜陵寢得地於河南府鞏縣南訾鄉鄭封村

按訾鄉  
即訾城

漢東訾聚

〔後漢郡國志〕鞏有東訾聚

〔施府志〕晉地道

記曰東訾在縣之東與杜預所謂在縣西南者異路史本杜預以鞏西南訾城爲東訾反以訾爲更在鞏西界外非也詳辨見都邑下

漢坎飲聚

〔後漢郡國志〕鞏有坎埽聚〔注〕杜預曰在縣東

地道記曰在南

互見邑城

宋任村

〔方輿紀要〕元豐初都水丞范子淵議引洛屬汴遣

內侍宋用臣等相視興役自任村沙口至河陰瓦亭子達汴

口接運河長五十一里 王安石臨川集任村馬舖詩注任村在鞏縣東

宋柴務〔文獻通考物異考〕咸平二年九月河南府鞏縣柴務牡丹華

按鞏邑村落多有以務名者西有石灰務南有鐵匠務西南柴務今爲稍柴務意皆宋時名目程明道提舉西京竹木務此其一也

書院

元嵩洛書院〔舊志〕在神堤保元左司郎中張惟敏奉旨修建

元河洛書院〔舊志〕在洛口元譙國公曹鐸建溝渠陂池並載

漢飲馬溝〔方輿紀要〕飲馬溝在鞏縣東七里呂布軍虎牢

飲馬於此

後魏南蒲陂蒲池〔水經注〕蒲池水出南蒲陂〔施府志〕

今爲凌溝菩提寺前水

宋神隄引洛入汴渠〔方輿紀要〕元豐初張從惠言汴洛水歲閉塞修隄防勞費往有建議導洛入汴患黃河嚙廣武山須鑿山嶺十數丈以通汴渠功大不可爲去年七月水退河稍北距廣武山麓七里退灘高闊宜鑿渠導洛爲萬世利都水丞范子淵請於汜水鎮北門導洛爲請汴通漕旣又言河陰十里店以西至洛口地形西高東下可行水請起自鞏縣

神尾山至土家堤築丈堤四十七里以捍大河起沙口至河陰十里店穿渠五十二里以引洛屬汴於是遣內侍宋用臣等相視輿役自任村沙口以至河陰瓦亭子達汴口接運河長五十里兩岸爲堤長一百三里自是汴洛通流六年范子淵請築新堤及開展直河元祐五年復導入汴紹聖初紹述議起因復閉汴口引洛水（施府志）隋唐運道漕轉江淮不過由汴入河由河入洛耳未有直通於汴者也范子淵議通洛汴其洛水北岸堤當起神尾山西至汜水河陰入汴口南過廣武二城間亦曰鴻溝所謂神尾山者北邙盡處謂神都邙山之尾也時又引古索河注三陂瀦水爲塘以備洛水

不足則決以濟之又自汜水關北開河五百五十步屬於黃河上下置閘啓開以通黃汴二河船筏又即洛河口置水澆以泄伊洛漲水入大河仍修黃河南岸堤埽以防侵奪新河之漸於是徙汴口官吏於新洛口其法密矣然廣武山北即大河故道洛水在鞏縣東北已入河時雖大河北徙攘其地以引洛水入汴而增築新堤不能久支故元祐四年梁燾上言復爲汴口導引大河又考宋史自引洛後洛水漲溢入河廣武埽危急朝議以埽去洛河不遠恐漲漫不灌京師旣而洛水大溢注於河帝曰若廣武埽壞河洛爲一則清汴不通京師漕運可憂詔吳安持等規度安持言廣武第一埽危急

決口於清汴口絕近緣河洛之南廣武山千餘步地形稍高自鞏縣東七里店至今洛口不滿十里可別開新河導洛水近南行詔再案視卒以元豐舊制但元豐每事更張舊制未必盡善也

### 宋沙口

按沙口今俗呼沙峪溝與任村洛口相連載方輿紀要已見前引洛入汴渠下

明神堤渠〔方輿紀要〕神堤在鞏縣北三里中低而四圍高常橫流爲患永樂十六年縣丞華胥開此渠而水患息〔施府志〕神堤在今縣北神尾山之下

### 倉塲

隋興洛倉〔隋書地理志〕鞏縣有興洛倉〔虞世基傳〕帝幸江都次鞏縣世基以盜賊日盛請發兵屯洛口倉以備不虞帝不從但答云卿是書生定猶恇怯〔李密傳〕密與讓領精兵七千人以大業十三年春出陽城北踰方山自羅口襲興洛倉破之開倉恣民所取老弱襁負道路不絕越王侗武賁郎將劉長恭率步騎二萬五千討密密一戰破之長恭僅以身免讓於是推密爲主密城洛口周迴四十里以居之〔玉海〕大業二年置洛口倉於鞏城周二十里穿三千窖〔施府志〕興洛倉即洛口倉也隋置倉於鞏者以鞏東南原上地高燥可穿窖久藏且下通河洛漕運也

唐洛口倉 〔唐書地理志〕鞏縣有洛口倉 〔六典注〕隋初漕關東之粟以實京邑有洛口倉唐因之 〔唐書食貨志〕宣州刺史裴耀卿條上便宜曰今漢隋漕路瀕河倉廩遺跡可尋可於河口置武牢倉鞏縣置洛口倉使江南之舟不入黃河黃河之舟不入洛口而河陽栢崖太原永豐渭南諸倉節級轉運水通則舟行水淺則寓於倉舟無停留而物不耗失此甚利也

### 關塞

古轅轅關 〔春秋襄二十一年傳〕晉欒盈奔楚過周王使侯出諸轅轅 〔文選薛綜注〕轅轅坂十二曲將去復還故名

〔方輿紀要〕戰國策張儀曰秦下兵三川塞轅轅緱氏之口史記沛公伐秦南出轅轅克之武帝淮南王安謀反欲塞轅轅伊闕之道建武九年帝幸緱氏登轅轅靈帝時爲河南八關之一建安初曹操奉獻帝遷許從轅轅而東晉懷帝永嘉二年羣盜王彌自許昌入轅轅敗官軍於伊北遂逼洛陽屯於津陽門三年劉淵使王彌等復寇洛陽不克乃出轅轅掠豫兗而東四年劉聰使其子粲等犯洛陽粲出轅轅掠梁陳汝潁間五年劉曜石勒等陷洛陽勒引兵出轅轅屯許昌後魏永安三年元顥入洛旣而敗於河橋輕騎南走自轅轅南出至臨潁爲人所殺唐武德二年討王世充王君廓攻轅

轅克之王世充遣將魏隱求救爲君廓所敗遂東徇地至管城而還四年王君廓與王世充將軍雄信等相持於洛口世民援之至轅轅雄信等遁去乾符元年王巢侵逼東都詔發兵守轅轅伊闕河陰武牢孔穎達曰轅轅山緱氏縣東南三十里道路險阨自古爲控守處〔明史地理志〕鞏縣西南有轅轅山上有關〔施府志〕後漢地理志緱氏有轅轅關緱氏入今偃師是轅轅宜隸偃師也又晉地理志陽城有萇坂關即轅轅陽城入今登封是轅轅又隸登封也惟明史以轅轅關隸鞏今關雖廢而疆域則一因明之舊志固隸鞏而於偃師登封二縣相接

漢小平津關〔方輿紀要〕靈帝時八關之一袁紹誅宦官中常侍張讓等將帝步出穀門至小平津晉永嘉末傳祗保盟津小城即小平津劉聰遣劉粲以步騎十萬屯小平津慕容暄遣將呂護攻洛陽退守小平津後魏常講武於小平津爾朱榮舉兵胡太后遣費穆屯小平津拒之〔施府志〕紀要以小平津入孟津今據名勝志入鞏互詳都邑小平城後魏石關〔伽藍記〕京東石關有魏元領軍寺〔施府志〕鞏城西洛水北有地名石關即伽藍記所謂京東石關也黑石關〔方輿紀要〕隋末王世充與李密相持世充夜渡洛水營於黑石明日分兵守營自將精兵陳於洛北李密渡洛



逆戰而敗復渡洛趨黑石世充還爲密所敗元致和初陝西諸王闞不花等討燕帖木兒之亂進至鞏縣黑石渡大敗河南兵遂克虎牢關上都已陷而還〔明史地理志〕鞏縣西南有黑石渡巡檢司〔施府志〕黑石山名在鞏縣西南洛水東與邙嶺夾岸相對如門洛水出其中爲東西京咽喉舟車轉輸冠蓋往來皆出於此明設巡檢司曰黑石關亦曰黑石渡洛陽東有成臯鞏洛之險今成臯入汜水而鞏洛之險無過黑石固留心險要者所宜加之意耳

元大栗關〔方輿記要〕大栗樹關在鞏東南三十里元時置寨

漢劉備寨〔李通志〕備寨在鞏縣西南原良保昔劉關張伐呂布屯兵於此

元季山寨諸屯〔施府志〕方輿紀要天堂山寨在鞏縣東南又有鹿耳鷄翎凌霄黑山等寨俱元季鄉豪屯聚處〔舊志〕鹿耳寨在趙封保石碛峻絕于仞壁立上有泓水止一小徑可通鷄翎寨在羅口保元人郝義於此避兵

屯堡

劉宋百谷屯塢堡 鈎鎖壘〔水經注〕休水又北流注於洛水洛水又東逕百谷塢北戴延之西征記曰塢在川南因高爲塢高一十餘丈劉武王西入長安舟所堡也〔方輿紀

要一義熙十二年劉裕伐秦軍至成臯秦姚洸鎮洛陽遣趙元守屯守栢谷塢毛德祖擊敗之元熙初司馬楚之避劉裕逃亡河南屯栢谷塢元魏武定初高李密以虎牢降魏宇文泰帥軍應之至洛陽遣宇文謹攻栢谷拔之隋大業十四年李密圖東都栢谷降密又宋書武帝西征營於栢谷塢西有三壘相連如鎖名鈎鎖壘云一施府志一水經注記百谷塢在休水東且舟師所堡必近洛水南今鞏縣以休水爲界休水出澗谷將入洛東三里有百峪上高數丈北望洛水即古屯兵之處其地西連乾溝東西寨如鈎鎖然即鈎鎖壘也名勝志及方輿紀要皆目二地爲偃師蓋因休水入偃而誣耳偃

志不知百谷即鞏之百峪而以緱氏之栢圪堵當之其地重嶺絕澗與洛水中隔景山知非舟師所堡矣

晉洛口屯一方輿紀要一晉大興初滎陽太守李矩使郭誦救趙固於洛陽屯洛汭誦遣其將耿稚夜濟河襲劉粲大敗之大寧三年後趙石虎敗劉曜將劉岳於洛西蓋在洛口西也後魏永熙末高歡自晉陽引軍渡河衆議欲守洛口死戰魏主不能從隋末李密據洛口越王侗使諸軍擊密夾洛水相守旣而王世充與密相持於洛水上爲密所敗義寧二年世充擊密於洛北敗之遂屯鞏北復渡洛擊密軍敗溺者無數隋橫嶺屯 百花屯一方輿紀要一橫嶺縣東三十里接汜水

縣界李密伏兵處百花谷在縣東南二十餘里裴仁基屯兵

處

互詳橫嶺道下

道路

驛遞附

晉鞏訾間道〔方輿紀要〕晉咸和三年石勒擊劉曜於洛陽至成臯捲甲啣枚詭道兼行出於鞏訾之間〔施府志〕所謂鞏訾之間者指故鞏城與東訾也東訾近故鞏城以鞏訾之間爲詭道知由成臯趨洛陽大道不出鞏訾間也蓋自故鞏城下洛水流兩山間不容大道由偃師北坂抵故鞏城下踰洛由石子河踰嶺抵今鞏城乃趨成臯石勒所謂詭道乃循洛水岸直抵洛陽不踰嶺上下故曰詭道兼行

隋羅口道〔方輿紀要〕隋大業十三年李密自羅口襲興洛倉破之又密將張善相爲伊州刺史據襄城自襄城北出羅口即長羅川口矣〔施府志〕今鞏縣有羅口保乃羅水出山之口非羅水入洛之口也方輿紀要以爲入洛之處誤矣其自襄城北出羅口必逕登封由登封西北出轅轅乃東北趨鞏其道迂遠故徑自登封東踰大山北至羅口道甚險今石坂道乃由登趨鞏之要道也

隋橫嶺道〔方輿紀要〕李密據興洛倉隋遣東都兵討之又使虎牢鎮將裴仁基自汜水西入以掩其後密分兵伏橫嶺以待仁基仁基失期不進屯於百花谷

按由汜水趨鞏徑壘子峪洛口此大道也李密倉城在洛口仁基自汜水西入循橫嶺至□花谷詭道兼行予密以不及覺所謂掩其後也密預知之故分兵伏橫嶺以待今橫嶺南有古道自汜至鞏東西四十五里較大道稍迂遠康熙初黃河傍山流大道不可行車馬往來皆由橫嶺開辟闢展不似從前險隘矣其堡猶有存者

明洛口驛 〔方輿紀要〕鞏縣東有洛口驛

津渡

漢五社津〔水經〕河水又東過鞏縣北〔酈注〕河水於此有

五社渡爲五社津 〔方輿紀要〕建武初遣將軍耿弇等軍

五社津備滎陽以東而使吳漢等圍洛陽是也

漢小平津〔郡國志〕鞏縣西北有河津曰小平津

〔隋黑石渡〕〔方輿紀要〕鞏縣西南二十五里洛水津濟處

隋末王世充與李密相持世充夜渡洛水營於黑石元致和

初陝西諸王閻不花等進至鞏縣黑石渡

宋訾店渡〔方輿紀要〕宋景德四年造訾店渡橋

明神堤渡〔李通志〕神堤渡在鞏縣北

明洛口渡〔李通志〕洛口渡在鞏縣東〔施府志〕訾店黑

石神堤洛口皆洛水濟渡處

明裴峪渡〔李通志〕裴峪渡在鞏縣西 施府志裴峪渡疑

即黃河小平津渡也

詳前都邑門

橋梁

隋鞏北浮橋〔綱目正編〕隋恭帝義寧二年王世充旣得東

都兵進擊李密於洛北敗之遂屯鞏北命諸將各造浮橋渡

洛橋成者先進前後不一密帥敢死士乘之溺死數萬人世充僅免

唐孝義橋〔會要〕天寶七載四月河南尹韋濟奏於偃師縣東山下開驛路通孝義橋〔六典〕水部凡天下造舟之梁四河三洛一河則蒲津大陽盟津洛則孝義舉京都之衝也〔施府志〕偃師驛路所通者今爲鞏縣黑石渡渡東北五里有孝義保以田氏紫荆名橋亦因此名歟

宋奉先橋〔玉海〕景德四年二月西京新造訾店渡橋癸酉賜名奉先〔施府志〕今鞏縣訾店渡北岸山上有會聖宮爲宋時謁陵飲福之所陵在洛南高原上由會聖宮過洛上

陵必由此橋故名奉先

明柳橋〔李通志〕柳橋在鞏縣東壇廟

黃帝河洛壇〔水經注〕黃帝東巡河過洛修壇沉璧受龍圖於河龜書於洛赤文篆字堯帝又循壇河洛擇良議沉榮光出河休氣四塞白雲起迴風逝赤文緣色廣袤九尺負理罕上有列星之分七政之度帝王錄記興亡之數以授之又東沉書於日稷赤光起元龜負書背甲赤文成字遂禪於舜舜又習堯祀沉書於日稷赤光起元龜負位當作書至於稷下榮光休至黃龍卷甲舒圖壇畔赤文綠錯以授舜舜以禪禹殷

湯東觀於洛習禮堯壇降璧三沉榮光不起黃魚雙躍出濟於壇黑烏以浴隨魚亦上化爲黑玉赤勒之書黑龜赤文之題也故春秋說題詞曰河以通乾出天苞洛以流古文坤字吐地符王者沈禮焉一施府志水經注紀河洛壇於洛汭以爲歷代圖書並出其地在鞏縣洛水入處則孟津所謂負圖河永寧所謂元滄洛書不得專有之矣但道元雜引緯書侈言符瑞儒者所不道然謂圖書並出於黃帝堯舜之世則其說必有傳也

周襄王廟一李璧王荆公詩注晏丞相嘗有過鞏縣西門周襄王廟詩人來人去市朝變山後山前烟霧凝云云

晋九山廟一水經注九山有九山廟廟前有碑云九顯靈府君太華之元子陽九列名號曰九山府君也晋元康二年九月太歲庚午帝遣殿中中郎將關內侯樊廣緱氏令王與主簿傳演奉宣詔令興立廟殿一施府志九山在水經注又爲百稱山今呼白雲山山際有舊山廟坡九舊音轉也箋云晋元康二年太歲在壬子而用歷經推之是年九月乙亥朔無庚午日也或傳寫有誣耳

百蟲將軍廟一水經注九山又有百蟲將軍顯靈碑碑云將軍姓伊氏諱益字隤訖帝高陽之第二子伯益是也晋元康五年七月七日順人吳義等建立堂廟永平元年二月二十

日刻石立頌示後賢矣〔施府志〕秦本紀云顓頊之裔孫大業生大費佐舜調馴鳥獸是爲栢翳索隱云伯翳即尙書之伯益列女傳臯子五歲而贊禹曹大家注云臯子者臯陶之子伯益也此碑謂益字隤訖帝高陽之第二子與史記異左傳所記隤訖庭堅並高陽氏之子杜元凱左傳注又云臯陶字庭堅則父子同在八愷之中不應並時而舉也見水經注箋

嚴子陵廟〔李通志〕嚴子陵廟在鞏縣東〔施府志〕鞏縣無子陵遺蹟通志亦不詳廟建何時又云一在宜陽縣上莊保

汾陽王廟〔李通志〕汾陽王廟在鞏縣西元至治間建郭子儀帥師過邑芻糧俱乏徵於此邑人告曰草可得糧不可得公問所以人告曰是邑南崗歲有妖霧害稼厥明公詣崗指之曰四方之亂除皆掃除妖氛敢爲害耶乃引兵還自是妖氛不復爲害五穀成熟故人立廟祀之〔施府志〕廟在鞏縣西南五十里漫留崗上廟碑所稱與通志同但通志以爲元至治間建廟廟碑乃金元光二年天黨越琢撰則通志誣矣又廟旁有洞曰風洞人以爲能出怪風壞田禾與碑稱出毒霧亦有異史傳不載無從考證而汾陽之德於鞏也則至今不忘云

元宓妃廟 李通志在府城東關元至正六年建偃師鞏縣亦有之



